

## DEBIL IL ZERVIEL MA FUARTE LA GRAMULE

I talians a' son int dispatussade, che no va a bazzilà par robis di pôc. Cussì mo' no si sa che si sein scomponûz masse, quan'che àn cognossude la liste dai sorestanz di chest gnûf guviâr, che si podares clamâlu "la sagra da l'incompetenze". Te Cjamare des cjacaris (p. t. Parlamento) di Rome a' son nassudis di chês barufis e di chei batibuis che nancje i neris de Liberie e i "criollos" dal Paraguai no si tègnin apajâz di fâ; ma par âltris resons: par chês bielis resons che i marionetârs dai partîz a' cognòssin benon, e noaltris, puars basoai 'o cirin nome d'induvinâ. Nissun si è nancje impensât di domandâ al paron dal vapôr cemût che un filosofant al podarâ mandâ indenant il servizi des puestis, o cemût che un sindacalist al direzerâ il moviment des feradis.

Pai talians ad implen, chestis no son nuvitâz (pôc o trop 'e je simpri stade cussì in chest paîs: cun Depretis, cun Crispi, cun Gjolitti, cul "Guidadôr"...); pai umign di partît, chel de competenze al è l'ultim pinsîr: ce ch'al conte 'e je la discipline, la fedeltât e l'ubidienze ai manovradôrs. Al val plui un biât Starace, bon di tirâsi parsore di sê il ridicul ch'al vares di colâ su lis spâlis dal "paron", che no cent umign di cjâf e di cussienze che varessin cûr salacôr di sta a quistionâ sui ordins, che varessin scrupul a meti in esecuzion lis cjastronadis dal Consei diretîf di un partît, che no olsaressin comprometi il lôr non e il lôr onôr cu lis buzaradis oludis dai puliticanz. Mancul a' capissin e miôr al è! Parcè che in Italie i sorestanz dai ministeris no àn di guidâ i lôr dipendenz; al baste che firmin, fasint la giatevuarbe, ce che ur ven metût diprin.

Ma, dopo dut, bisugne pûr che il machinari ministeriâl al vada indenant in qualchi maniere; bisugne pûr che, ben o mâl, i siarvizis a' funziònin, che lis praticis - cul svuirz o cence svuirz - a' vegnin distrigadis, se no in tun an, almancul in doi o tre; insumis bisugne pûr che qualchidun al vebi chê competenze che mancje al sorestant. Nissun pinsîr: 'o vin pursi la burocrazie, i caposdivision, i diretôrs, i ispetôrs, i sacrataris, e vie indenant: votcent e passe ufizis di cheste fate!

E culi competenze a'ndi è di vendi: competenze stagjonade, parcè che i sorestanz a' pàssin e il personâl al reste: simpri chel, cul re, cu la republiche, cui neris, cui ros, cui blancs, cui verz: simpri pront a fâ fente di ubidî; competenze furnide di gramulis mastodontichis, che san rumiâ fiâr e che cognossin duc' i striamenz par gjavâ sanc ai clas; competenze indispensabil, che sa profitâsi di cheste indispensabilitât par vendi cjare la sô opare.

In cheste maniere la cangrene taliane, la burocrazie che fâs fraidessi la nazion dentrivie, 'e quiste simpri plui impuartanze e plui autoritât; 'e devente simpri plui parone de situazion e la volte e la rivolte secontri che i torne cont; 'e sgagnis di duc' i lemenz, lis protestis de int, di dutis lis promessis di riforme e di decentrament, di dute la decadenze dal paîs. Duc' la maludis, duc' j spude in ghigne, duc' proteste cuintri di jê: e jê 'e va indenant pe sô strade cence scomponisi, cence cirî di justificâsi, cence movi un dêt par parâsi, cence spindi un carantan par che un gjornâl al scrivi almancul une rie in so favôr. Cussì pôc j impuarte ce ch'al pense il public; tant sigure 'e je che nissun podarâ tocjâle!

Patrie dal Friûl, n. 5 1/15 di Marz 1950